

四庫全書

集部

欽定四庫全書

集部

文端集卷三十六至

詳校官庶吉士臣汪彥博

助教臣常循覆勘

總校官降調編修臣倉聖脈

校對官中書臣葉蘭

謄錄監生臣潘炯

欽定四庫全書

文端集卷三十六

大學士張英撰

篤素堂詩集七

鄭又蓮九十壽

鄉國羣推九十翁
餌芝道體日冲融
康成雅擅通經譽
谷口人依尚德風
秋滿萬山楓葉紫
酌宜大斗菊花叢
期頤健比凌霄鶴
碩果嵬峩洛社中

臘梅二十樹自去年十月開至今正月題曰古香

十句紀之以詩

小庭何所有黃梅開近臘歲月歷冬春香光迷紙閣梅
花似美人此種類老衲凡卉有芳烈此香如艾納坐卧
香色中清吟統一榻幸遇冬日暝寒蜂自雜還

宿盱眙坡黎泉

山椒聚奇石崖畔出名泉泗水懸孤塔淮流漲百川烟
波迷雉堞燈火數漁船轉徙殊堪憫應邀

聖主憐

宿金山寺

千古山川麗孤峰景物幽乾坤勞砥柱日夜擁江流樹
色雲中塔春風石上樓我來叨扈

蹕鐙火滿汀洲

三月初二日蒙

恩賜

御書雙溪秋水軒種花處扁額恭紀

龍眠十畝莊烟柳聽黃鸝兩水落澗壑沿緣來丹梯遊
魚淨可數纖鱗不能迷桃花夾兩岸引之入芳隄

至尊勞問訊寶墨書雙溪更有篋當谷波暎浴鳧鷺中
有秋水軒芹藻出香泥

宸章若星漢懸向千峰西予昔癖種花頗為時俗詆焉
知種花處親承

御筆題

田間野花

村邊麥浪影交加
陌上驅車日欲斜
紅白枝枝偏近水
野田蔓草夕陽花

獨樂吟

秋水何淪漪
茂樹臨清池
喜無人迹到
鳴鳥集高枝
閒關弄好音
使我心自怡
靜日步長廊
獨樂良不疑

建蘭作花

嶺南花葉重
培栽手護青
青點綠苔客
歲苦寒花事減
幽窗猶見百枝開

蘭開經旬未得入山

溪上經旬未泛槎
溯洄何異隔蒹葭
荷花久負山中約
為惜盆蘭正作花

泛舟

薄暮日欲落
迴舟泛清流
蟬噪村逾靜
鳥唳林自幽
心澹一無營
喧寂任所投
我心如明月
浮雲在下頭

入山觀荷花初放

予從京洛返東菑
纔見田田貼水時
新葉漸看翻翠蓋

藕花初見出清池，輕綃不染裁冰潔。
仙質無虧琢玉姿。
晨露乍晞，山雨過，此中相賞更相宜。

八月十一日山中荷尚開數十朵

碧水清池一道斜，自從榴火簇新芽。
紅粧翠蓋重陽節，
常看人間耐久花。

正月二十七日宿山中夜大雪曉起作詩

曉起推窗見玉龍，梅花盡被白雲封。
平生謾說瓊瑤島，
誰見松梢雪萬峯。

梅花驚蟄已全開
遶樹耽吟日幾迴
不是山中經信宿
斷無人蹋石溪來

作詩後廷璐入山

積素連空失磴阿
寥寥山路斷樵蓑
玉峰千尺瓊為樹
竟有人衝雪棧過

西渠先生侵晨至景麟堂復過雙溪日未亭午約
行四十餘里成一律示予喜而賦之

龍馬精神海鶴儔
追陪晨夕得歡遊
一筇曉露平明出

萬壑烟霞頃刻收已見空山成獨往還攜餘興步雙流
劍南人物衣冠在大耋高蹤不可酬

秋日

小圃秋陰暑漸涼紫薇花發照魚梁何人領取閒中趣
團扇行吟百步廊

寄廷玉

時奉

命充日講
起居注官

承恩早歲玉京遊汝正懸弧歲一周三十二年文陞上

從前兩世立螭頭

予以癸丑歲充日講起居注官時廷玉甫一齡廷瓚復繼予後今廷玉新

有是

命前後凡三次矣

除夕賦得十韻

臘梅三十株黃雲塞戶牖愛此香色古開當岑寂後不
艷桃李姿歲寒常相守紙閣啓南榮晴光朝暮受郊原
梅未發春色在瓦缶短枝何曲盤名卉侵坐右斗室天
壤寬清琴間尊卣嶺南橘柚黃香光園一叟兒孫喜團
圓旨酒為翁壽予飲雖不多清光毋相負

新春入山

野田黃雀啄柴籬
節近青陽草色知
人到小亭耽徙倚
梅花昨夜放南枝

葺舊館成

舊業荒蕪長綠苔
經營手自剪蒿萊
城頭縱覽偏宜月
屋角開窗恰見梅
深院杏花圍小閣
隔溪柳色入平臺
西山翠靄看朝暮
山雨山烟次第來

三月三日宿花家莊

淮河宿霧轉塵沙上已春風苦憶家盡日荒村茅屋裏
西園辜負海棠花

恭和

御製賜高旻寺僧紀陰詩原韻應制

江郭祇園一水中高僧石隱市廛東忽聞

藻翰垂霄漢彌望天花落半空清澈機鋒塵界淨光明
色象紫雲籠祇今佛日照回處庶苑千秋景物融

金山寺

咫尺天關若可捫，濤飛霧捲濕雲根。
千尋石色中流見，萬里江聲砥柱尊。
地濶天空涵氣象，蛟蟠龍躍共朝昏。
我來扈

蹕登高閣，遙望烟光接海門。

山中積雨

連宵夜雨響溪聲，霧滿山腰不放晴。
雲接遠村千樹合，波涵清鏡一奩平。
黃梅果熟泥中落，碧藕花歌水面生。
莫怪奚童遲送酒，河深今日斷人行。

即事

禾黍吹香落照斜
課奴鋤地却還家
不嫌十日山中住
為看秋蘭二番花

蘭開二番移盆入庭中

桂林香動隔隣家
菊蘂攢枝已放芽
白露纔過殘暑退
老翁生計理秋花

夜坐

閒栽花竹滌塵襟
久矣鐙前廢苦吟
坐擁梅花三十樹

月明猶自理清琴

入山看梅花

山烟初破客重來
地濕莎青長綠苔
驚蟄纔過三日雪
梅花猶剩五分開
醉吟高士醒初解
羽化仙人夢乍回
好景莫教容易得
教兒且與發新醅

歲盡閒居

溪山雪擁廢追尋
撿點清歡發苦吟
斗室梅花香作繭
客予爐火坐來深

除夕

山寒梅未花且復居斗室
盆梅三十樹氣盡雜書帙
交錯花枝繁櫛比花房密
香光塞戶牖趺坐僅容膝
斐几羅琴尊與翁稱六一
翦燭照花紅煨爐避寒栗
自烹綠雪茶於此享清逸

恭賦

南巡頌德詩

聖懷周八宇宵旰切維寅
化洽寰區俗風行薄海民
金

湯羅郡國簪紱肅臣鄰奎壁輝文囿弓旌賁隱淪高岡
儀綵鳳廣漠集祥麟赤縣謳吟徧華封祝頌閭山川三
壤則玉帛萬方賓駿烈光前後鴻規邁等倫

帝容時穆穆

王度復眈眈首出宏功運無為大化神甘霖霑綠野淑
氣起青蘋鴈塞三驅埽龍沙萬乘巡平成瀚海滋浩瀚
軫河漭耕鑿田為壑隄防土作堙蒼黎傷轉徙

宸極憫艱辛念此桃花漲還同瓠子津帑金司庫給雲

鋪庶僚徇星鳥方司歷蒼龍正早春陽回沙岬映水泮
草痕湮

睿慮勤籌度

皇心重拊循和鸞聽肅肅綵鷁覩旒旒羽扇開雲表霓
旌駐水瀕觀瞻紛里閤驚蹕撒郊吟舉棹花光映揚舲
柳色勻源流勞審視道塞互咨詢上策聆

天語成模示近臣佇看新隴陌重理舊耕畝比戶驅秧
馬臨淵捲釣綸載歌疆翼翼何患水泯泯吏治諮謀切

王言誥誠諄問閭情可念象魏法宜遵廣沛茅檐澤遥
飛驛路塵雷塘舟再御茂苑輦重踰江渚經千里風帆
未浹旬澄波揺豹尾清景照龍鱗慶洽扶筇叟恩施解
網人方言資採擇民隱許敷陳求駿金臺築衡材玉尺
掄冲和

天表近渙汗德音新拜首瞻青雀歡聲達

紫宸蘇臺逢慶節虎阜值良辰岳牧偕黃耆岡陵祝大
椿嵩呼騰地起景祐自天申圖牒陳千瑞盤匱獻八珍

冠裳趨帳殿氓庶塞城闔佩德心原摯觀光氣益振烟
波何渺渺蠶室盡溱溱

法駕臨吳越休聲動浙閩綏方寧憚遠問俗豈辭頻車
不驚桑陌舟常艤水濱城陰湖澈滌溪畔石砢磷花港
初移柳孤山近剪榛遊觀心愈惕經畫額常顰選俊寡
芳杜澄懷對綠筠停橈看馴雉駐蹕聽鳴螭紫筍方垂
籜朱櫻始破脣淵懷期治洽深念冀民淳扶杖容相接

迎

鑾近不嗔彤駟環

帝子雕輦奉

慈親孝養超千古尊榮備一身語櫓知鵲喜舞權見龍馴
留

駕誠難却旋旌義不填衢歌咸濟濟巷舞總恂恂

御藻垂天漢恩波浹地垠省方兼省吏含笑復含嚔建
業澄江繞長干紫氣氤千村花作圃萬井稼盈畝黃紙
新恩徧烏衣舊俗醇土風陳碧藕野蕝進芳尊南國歌

游鳳東方喜貢珣荷錢初的的桃實已蓁蓁刈麥青如
毡烹鮮色似銀射侯穿柳徑錫宴坐花茵澤厚江同永
功高嶽比岫賦蠲民有慶刑措獄無呻賜札榮邦彥遺
簪憫舊紳井鹽輕課額漕粟發陳因喚雨鳩為婦催耕
烏曰鵲良材蘅芷擷芳草蕙蘭紉渥賜旌廉直流膏起
瘠貧膠庠伸士氣闢權減商緡勝地皆留蹟崖碑許刻
珉民心如挾纊

帝盼在懸鵲率土歸元化敷天託至仁永無嗟在澤惟

有慶吹豳嘉祉蒸民粒和風萬國甄虞巡羣牧觀禹會
百祥臻獻賦紛瑤軸攀轅擁畫輪

一人操斗極品類入鴻鈞農自歌遺穗官無歎積薪光
同珠的礫治比玉斑璘未獲隨鑾御無由侍佩巾晨昏
睽子職依戀本天真頌德心逾慕摘詞意每逡敬賜光
被盛瞻仰抱誠純

揚州左太守贈鶴二隻以籠置舟中載歸

邗水東歸興邈然故人相贈縞衣仙扁舟夜泊空江水

自起提燈照鶴眠

夏日居五畝園

清池雙鶴自徘徊
避客應無剝啄來
綠樹陰陰簾影靜
幽蘭花擁坐隅開

移蘭

愛此嶺南花
羅我渠兒側
我來坐朝暮
沈酣廢寢食
翠葉碧如油
辛苦自培植
高枝挺百箭
枝淨如拭
幽意淡天真
無心鬪香色
靜好洛川神
窈窕關雎德
空階竹

陰靜深苑簾影直風定池水平靜對忘語默邈然潛心
性此意誰能測我自領幽趣長鳴鶴應識

松下構一亭用東坡語白首歸來種萬松

涉世頭已白歸來學種松時值辛未歲買山清澗東傍
水有修隄蜿蜒若長虹種松高二尺短鬣早青蔥迄今
十七年枝葉已數重高者二丈餘謾謾來清風特為置
一亭偃息深林中雖有蚪枝古翠色迥不同微颺過枝
梢細響若笙鏞有時風乍起濤聲走碧空俯仰聞天籟

置我蓬萊宮我師陶弘景千載躡高蹤

溪上看芙蓉

楓蘋柏紫間青松石角斜飛出幾重老我慚為溪上客
小舟烟雨看芙蓉

陸犀之松江作此送之

以下補遺

霜濃菊老正深秋憐爾南歸攬敝裘自昔買山曾有願
好憑彈鋏問西疇

題曹天全小像

鍊氣凝神入窈冥手攜芝草誦黃庭桃九熟鶴千齡爭
似松濤萬壑青

玉蝶梅盛開

枝頭碧玉避寒裁早發春葩送客回京國迢遙二千里
江南猶見晚梅開

二月十八日宿高橋故鄉人來言庭梅冬暎大放
小庭春事早相催經月紅英點綠苔不是梅花不相待
但聞歸信即先開

夏日

瑩瑩波色入簾青
曲曲迴廊繞一亭
我正閒吟池上句
鶴如相伴亦來聽

嘗新

早禾初刈立秋前
穰穰香風滿一川
白粲河魚新薦廟
乞歸欣得遇豐年

文瑞集卷三十六

欽定四庫全書

文端集卷三十七

大學士張英撰

篤素堂文集一

賦

瀛臺

賜宴賞花賦

有序

時當清晏海宇謐寧

皇上以聽政之暇臨幸西苑俯念諸臣勞於職事特行
曠典

召集瀛臺賜之宴飲凡公卿侍從臺省之臣咸得與於
斯禮

溫綸春藹

聖澤如天誠太平盛事千載一遇也

小臣

隨惇史之末

班幸際昌期躬霑湛露不揣固陋謹拜手以誌其盛賦
曰維深嚴之紫禁當宮闕之西隅啓薇垣之右掖居金

兌之雲衢為宴閒之勝地比瑤島之仙都宮槐百尺御
柳千株山名萬歲鎮北極而環神武水遡玉泉入太液
而泛蓬壺清流滌洄於玉砌蒼林掩映夫金鋪北則有
瓊華之島窈蒼翠而玲瓏南則有迎薰之亭燦金碧而
穹窿蠶室峙其西蕉園列其東其臨流也則朱闌繡柱
者水雲之榭其冠山也則穿雲竦漢者瀛臺之宮九島
紆折於百步三亭宛轉而相通浦號藏舟煙波深杳臺
名垂釣淪漪旋繞雕梁落影於波心瑤殿分光於霞表

望雙闕之觚稜隔瀟湘而縹緲好鳥集於菰蒲嘉魚唼
夫蘋藻其制作之麗密也銅龍噴水而泉落雲標金鳳
銜珠而光騰樹杪礎甃書蟠螭之象藻井有垂蓮之巧
水檻則下瞰潛蛟山樓則平臨飛鳥其為橋也石鯨飛
動玉螭逶迤遙接乎西城之陰遠通乎北渚之湄堆雲
積翠龍卧虹垂帶晚霞而璀璨射朝旭而陸離其為木
也槐陰蔥鬱松影參差琪花瑤草湘芷江蘺圓殿之古
柏千層霄而蔽日兔園之薜蘿垂倒影而臨池其為丹

也龍樓鳳舸望若丹霞月臺宏敞僊鷗繁華開綺窓而
近柳坐瓊筵而泛花疑鑑湖之鼓楫髣銀漢之乘槎又
有百果之園百鳥之室桃杏棗梨有蕃其實孔雀鸚鵡鴛
鴦鸕鷀入瑤筐者珍果盈千閉雕籠者文禽非一外則
繚垣周布羅列星廬萬家隱見於雲樹西山翠滴於庭
除內則珠簾玉檻雕櫳綺疏耀晴雲與碧澗若水晶之
映璫璣上則飛甍寶頂纓絡瓊琚似浮空而未落出高
柳而憑虛下則流觴曲沼鳴湍石渠時潺湲於水碓泉

聲落而徐徐洵

皇宮之壯麗豈數乎瀛洲方丈之所書若乃時當避暑
新荷滿汀紅蕖吐艷翠蓋高擎千頃一色紫萼朱英朝
簾初捲望之若繁星之輝碧落夕幔未收睇之如朱霞
之在赤城獨其發潛淵而振采泛清泉而濯莖實甘旨
而芳烈藕雪淨而冰晶製芰荷以為衣豈同乎凡卉之
徒榮所以風人采之媿美於幽人之潔楚騷詠焉比德
於君子之清爾其帶雨含煙飆風浥露北渚叢生南洲

密布時開時落或妍或素曉氣空濛微香暗度此固景色之尤佳而園林之堪賦者也

皇帝躬親庶政勤勞萬幾日旰而食未明求衣值勵精之偶暇暫宴息於宮闈是時也晴雲卷香露晞乘法駕載鸞旂過垂楊之輦道臨沼沚之芳菲喜棠棣之交映快花萼之羣輝乃設玉醴布華筵開水殿對芳蓮金盤玉筋舉網烹鮮

念諸臣之在職皆鞅掌於經年舉泰交之盛事同慶賞

於花前開堯室之衢尊列周京之豆籩是時鴛鴦成行
簪裾咸集佩綬懸魚聯珠合璧露湛僊醪霞張綺席分
左右而成行舒鸞鳳之彩翮花夾岸而錦障生香柳覆
堤而長廊盡碧羣虎拜而揚休承

天語之渥澤如登春臺羣心悅懌

天子乃御畫舸泛南河篙師擊楫榜人和歌龍氣遙成
五采結飛蓋而凌波舟頻移於密藻櫂自轉於新荷起
沙鷗與白鷺迎錦纜而偏多乃

命羣臣咸登畫舫大官設席酒正司釀水平若鏡微波
細浪擊汰乎臨漪之亭迴舫乎平橋之上坐昆明之碧
水眺香山之疊嶂極遊觀而未已許溯洄而蕩漾舟隨
浦曲人與花深桂橈頻轉蘭漿遙尋旣徧乎芙蓉之沼
遠泊乎槐柳之陰飫

君恩之無極感遭遇於臣心猗歟盛哉繼在鎬之休風
修曲江之遺事賞花垂釣嗣徽宋宗柏梁賦詩軼美漢
禊信可垂於國書亦足風茲有位天池御苑以泳以游

惠風遐暢嘉氣旁流

皇心載悅羣工咸休以示慈惠匪樂優游期上下之交
勵當勉之乎為楫而為舟雖翱翔於西掖而心實周乎
四海與九州

喜雨賦

有序

康熙十有七年季夏之月經旬不雨暑氣煩蒸火雲麗
空炎景燦物驕陽可畏恒燠有徵

帝心惕然念雨澤愆則難冀豐穰之慶陰氣鬱則恐為

災沴之由爰是發

德音下明詔懸韜鐸求昌言嚴恭寅畏齋被於宮廟穆精誠禱祠於

帝致齋之次日乙酉陰雲四合電掣雷轟雨沛於中夜禱祀之次日戊子涼颼候至煙霏霧結雨澍於亭午於以滌枯潤槁育物寧人皆

聖心為之感而

天心為之應也

臣

近侍內庭備詳

宸慮職居惇史宜誌

天休猥以蕪詞忝茲盛美敢拜手稽首而作賦曰蒼蒼
無垠者有象之天天心之所屬兮則在乎璇宮之側黼
席之前蓋君身所以配帝而主極所以承乾故明作而
幽贊兮若璧合而珠聯月維季夏律叶林鐘司晨者赤
帝乘權者祝融覩陽景之南至仰大火之昏中維斯時
也炎歊蒸鬱熾日蘊隆上無纖雲下無微風陽坂飛煙
於火井羲輪銜耀於燭龍氣欲流金威能爍石濯寒泉

而猶溫對冰壺而如炙力已倦於蒲葵衣不勝夫締綌
萬戶千門六街九陌咸流汗之成漿或狂呼而動魄謂
今茲之溽暑實罕邁於疇昔雖迎涼之殿含露之臺珠
簾高捲綺窓洞開其如畏景暄赫烈日昭回觸炎威之
四至鮮薰風之南來列子何以御之而冷然楚王何以
臨之而快哉是蓋夏無時雨陽愆陰伏積此亢旱蒸為
煩燠胡以慰我三農長我百穀四野望之而驚心萬夫
因之而蒿目

天子曰咨在予一人雨暘有忒矜此兆民沛

王言之渙汗垂清問於絲綸爰咨卿貳民瘼悉陳輟朝
撤膳興於朕身將有事於

南郊先致潔於明禋於是端居穆清蠲慮靜志上達穹
蒼捷如符契雲油油而被天雷隱隱而出地雨霏霏而
入簾風依依而生袂聽靜夜之沾濡愛宮槐之含翠此
蓋

睿念之方興已獲上靈之報賜致齋三日時維厥明

天子乃御輕輦聽鸞聲享

園丘禮太清薦紫壇之圭璧奏玉琯之韶頀穆穆乎皇
皇乎覩千官之肅而咸師

一人之誠法駕載旋爰居爰處惟德動

天翼日而雨石鷺雙飛商羊對舞雲興於西日之方午
始而度鳳城過龍樓氣靄靄而如暮聲颯颯而兼秋浩
乎如風檣陣馬之疾沛乎如江濤波影之流已而滴瀝
飄揚滂沱汪濊細珠濺於果湄飛點侵乎綺綴其泛碧

落而下也若九天之瀑布高轉於銀河其緣鴛瓦而注也如百道之飛泉下垂於玉砌

天子坐廣厦啓彤扉歌有渰之萋萋詠興雨之祁祁任輕霑於綺席從飄灑乎御衣

天澤無疆

宸顏有喜爰命侍臣憑高眺視優渥遍乎九垓霑足同於萬里豈止畿甸沐膏澤之施三輔獲田疇之美猗歟盛哉古稱雨金雨粟雨玉雨珠曷若茲雨澄映涵濡涼

逾瓊液甘若醍醐良苗乍起酷暑潛驅登斯民於富壽
之域又奚有貧札之虞蓋由我

皇之德馨香上聞故其動於中也膚寸而雨徧天下網
緼若泰山之雲更何藉乎土龍之逐逐與巫史之紛紛
古人之言諒哉人主應天以實不以文

璿璣玉衡賦

有序

粵稽古聖凜欽若於昊天伊昔哲王重仰觀於懸象自
迎日推算肇起軒皇迨定歷授時首詳堯帝益法其廣

運所以符乾德之貞紀其遞遷所以重民事之序然九
垓八埏之數既寥廓而難稽四時五紀之行亦紛繁而
莫辨故觀天有器窺象有儀曰周髀曰宣夜曰渾天法
已傳於邃古曰三辰曰四遊曰六合製漸備於疇人爰
考虞書設璣衡以齊七政歷稽漢制鑄銅渾而象九圍
黃道分二極之中日月周於天紀銀漢貫列辰之次經
緯燦於雲衢布位以象星躔數珠璣之錯落設管而窺
辰度琢瓊玉之玲瓏惟此制器之神奇允為言天之規

獲法以久而益密繼之者漢有張衡思以巧而愈精窮之者元推守敬我

皇上稽古正學敬天勤民審哲性成寶鼎呈祥於炎厯
雍熙時協莫階紀瑞於堯年綏六宇而泰階平撫五位
而文昌耀靈臺測景特專儀象之司玉歷調元遠紹重
華之日益由

皇上心與天一智在器先恭默足以窮神聰明尤能察
物故不獨微危精一遠繼美於虞廷敦典慎徽上嗣休

於為水即璇衡之制今古同符敢拜手稽首而獻斯賦
賦曰維乾象之灝灝渾周徑而無端故擬之者如倚蓋
而象之者如彈丸或景長而多暑或晷短而多寒其數
之無可紀極也雖隸首而莫殫古人以神靈之絕智創
儀器之精微爰法天而奉若實先天而不違定兩極之
南北持二儀之樞機星辰隨而耀彩日月轉而周輝齊
消息於陰陽窮天地而範圍其為器也或謂肇自宓義
或謂原於帝嚳馬融歎其精而王蕃踵其躅經漢唐而

代新歷宋元而遙續仰以協乎天經而俯以維乎地軸
其為制也動隨日馭健應乾行運宵旦而不息配三百
六十五度之常貞乾坤肖其闔闢萬物視為枯榮陽烏
同其出沒兔魄逐其虧盈若太虛之無為常不言而化
成其經星之麗乎其上也三垣奠中央列宿羅四維紫
極昌乎帝運前星耀乎儲闈招搖東指而熙春大火西
流而涼颼南箕北斗并鉞參旂壁壘羽林之府東壁文
章之司莫不託體圓象逐候推移其緯星之周乎其外

也聚井會奎編珠聯璧或隱或見為前為却金火遇而
或逢其災歲星在而人蒙其澤莫不視躔次為機祥因
天行而順逆其游環之旋繞乎其側也以二道之交周
驗二陸之寒暑天地以斯為襟帶日月以斯為戶牖包
九有而亘八紘固即近而可覩其取乎璿璣也川澤之
珍輝聯象緯配景慶之光華萃螭珠而非侈其取乎玉
衡也山岳之寶氣燭穹蒼藉管窺之遙測何積氣之難
量所以制列三重經累朝而不改法沿數代當景祚而

彌昌抑臣聞之人君德及方外化被羣生則五氣順序
七曜咸平陽愆陰伏之不作而薄蝕暈珥之不驚然後
乾施而坤載天清而地寧必星紀之不忤斯天與器而
偕行然則璣衡之為物也可以察天心可以觀主德可
以驗政刑之臧否可以覘運會之通塞天市應乎明堂
北辰配乎皇極涵益法其咸周時敏倣其無息司歷者
藉之以覘天而人君因之以取則今

天子至德冒於海隅來享通於絕域

聖治所及則如璣衡之無所不覆也勤政則辨色視朝
典學則夜分側席

聖心所涵則如璣衡之無時不運也文治揚其光天章
煥其彩則如璣衡之經緯咸備也張弛之盡善調變之
適宜則如璣衡之與時進退也猗歟盛哉瞻渾象之輝
煌誕玉質而金相昔命官於虞帝今作賦於明光配天
宇之鴻濛同

帝德之無疆臣叨恩於珥筆敢因物而敷颺

南苑賦

有序

康熙十有二年癸丑孟夏之吉

天子臨幸南苑六軍雲會萬乘雷動

小臣

初忝文翰之

班特奉

命珥筆以從目覩曠遠之神臯心懾豫遊之禁地平疇
綠野時值豐穰大輅青旂備觀鉅麗復拜

綸音命獻詩賦一介鄙儒遭逢

盛事頓忘譴陋竊効謳吟謹拜手稽首而獻賦曰維神

京之南甸有振古之名區廣衍號稱陸海蕩平繼美康衢薰風拂於南極旭日照於東隅以曠則瞻眺雲物以稼則地脈膏腴洵邦畿之沃壤亦天開之畫圖其北則鳳城萬雉龍樓千仞紛掩映於丹霞聳雲表而高峻其南則冀野平陸金臺崔嵬以燕齊為襟帶接韓魏而宏恢其西則太行居庸層巒疊翠遠苞秀而毓靈蟠鬱蔥之佳氣其東則碣石天津川源奔匯萃淑景於中央輦北平之地勢其水則清渠環繞味比甘泉石橋橫而長

鯨飛動畫舸繫而彩鷁踰躔高柳垂而飛絮密荷簇而
如錢嘉魚咸沐於大澤錦鱗戲而便娟其木則宮槐禁
柳浥露合煙松柏鬱秀桃李爭妍繞別殿而千章色蒼
翠而參天其獸則獐鹿麋麇黃羊白兔野雉朝飛幽禽
在樹每應弦而輒中時儵俟而羣友既草淺而獸肥復
風高而鷹驟其外則周遭百六十里跨川原而為牆長
畝繡錯於平壤花邨散布於崇岡瓜田則千畦共秀麥
隴則比戶同穰其內則宮闕參差於綠樹亭臺虧蔽於

疎楊列東西而為宮分新舊而殊方茅茨土階之儉約
規制髣髴乎陶唐東有穹窿之高閣金碧照耀乎初陽
祀帝則華而非侈

行殿則簡而何傷紅門峙若丹巖

輦路平於翠陌高臺號曰晾鷹亦因故而不飾農田耕
鑿之雜處雉兔芻蕘之接迹同文王之靈囿偕斯民而
待澤漢之五柞唐之溫泉制不師古崇侈極妍金鋪玉
砌冠山架淵華林園之宏鉅昆明池之蜿蜒彼皆窮夫

民力此獨任夫天然考歷代之園囿烏得與斯苑為比
肩於是月當孟夏炎帝司晨隴彌望而如繡麥垂穗而
昀昀條桑陰於廣野微雨浥乎輕塵

天子重時巡而觀穡慶麥秋而省民乃駕蒼龍建翠旂
百靈扈蹕七萃羣飛周廬似列星之布萬騎奪雲錦
之輝旆悠悠而風動涼颯颯而生衣登高原而縱遐矚
翠輦時駐於翠微曠遠絕夫塵囂帷天地而幕六合地
最宜於經武比岐周之鎬洛寓訓練於馳驅騁驂留於

寥廓

天子御馬行將循蒐苗之古禮格飛走於林壑乃武事之既績更勵精於典學和風快其南來微涼生於

殿角雖遊豫之晏閒羅縹緗於

紫閣微臣時陪周宴日聽虞琴忝鄒枚之後乘隨衛霍

之華簪幸遭逢於

盛世徵虞人之獻箴願作頌以比勲華敢擬長楊之興

上林

駕幸闕里賦

并序

皇帝御極二十有三載重熙累洽區宇乂安文德覃敷
聲教暨訖乃稽古時邁肇事岱宗謁祠闕里典禮崇重
恩澤優深臣庶懽欣遠邇嘉歎夫元和盛年咸平昌世
僅奏六代之樂修再拜之文猶垂式簡編流輝今古詎
有遠御

六龍親詘

萬乘展隆儀于稽拜施殊敬于儒先

聖德顯隆如今日者焉洵足以超軼往牒焜耀前紀也
臣幸際昌時得瞻鉅典雖固陋翦劣不足以發揮鴻藻
然珥筆承明職茲紀載頌揚

休媿敢曠司存謹拜手稽首而獻賦曰於爍惟

皇繼序纂光本仁祖義昭憲考章奠玉衡于神軸握金
鏡于天閭調四氣以通正飭八風而協祥于是西踰細
柳東跨扶桑交河北徼比景南鄉靡不丹梯走傳碧海
浮航輸琛太府隸名職方耀幽遐以日月襲鱗介而衣

裳越萬里以入贄重九譯而來王是以化洽太和道隆
邃古納九垓之管鑰總堪輿之局戶參天地之清寧儼
貞明之作觀文軌合而謠俗同跂喙恬而草木廡軼埃
壻而苞混茫駕羲軒而凌三五焉

天子迺高拱垂裳中央運斗容與義林優游書數河寶
丕宣洛符誕受典學弘文銘楹箴牖探珠淵之秘筌陟
玉山之高阜德蕩蕩以無名治熙熙而何有既則沖然
永念穆然深思曰儀象肇啓道法昭垂寢明寢熾惟君

惟師羣聖一揆六經同歸王澤下竭頌聲式微孕星鈐
于上瑞錫麟紘于昌期毓龍蹲之至德挺鳳跼之殊姿
集大成于千古開絕學于來茲溯平鄉之懿躅景闕里
之崇規庶幾哉聞見可接羹牆在斯舉時巡之隆典秩
釋奠之隆儀爾乃乘大路控金鉞蹇翠羽捎文虹屬車
按節繁吹鳴笳七翠鱗附千官景從馳道則五里十里
旌門則一重再重集于泗水之上幸于尼山之宮斯時
也清羽司音初陽應律葭管煙霏芸房露茁氣不慄以

時寒序將周而朔易撫景物之澄鮮攬風雲之明瑟旌
旗捲而廣野回春帳殿開而暮山凝色遂乃肇舉吉祀
肅奉精禋春卿贊采祠官眡牲朱火西蘊元酒東陳嘉
籩廣豆豐粢潔盛振羽籥之六舞合咸英之九成薦祝
號之明信導神絃之降迎穆穆

宸容靡靡天綈殊禮展謁隆文錫賚覲靈爽之長存儼
哲人之如在感神契以潛孚體道真而昭對洋洋乎儼
儼乎與珠庭月角授受于千載之間玉節金鏗疇答於

一堂之內也禮度有嚴威儀告竣登堂入奧規周矩還
瞻聖里之岷岿憩廣庭之靜便布兩楹以翼聳峙雙闕
以星懸藉杏壇之修蔭挹璧池之素漣偃息于道德之
府遡泳于圖書之淵於是芝蓋重葩龍旂曲柄貴擬一
人尊侔萬乘述素王之嘉讚發五言之

睿詠海嶽遜其高深星雲並其輝映斯則

聖天子蘊道之淳風崇儒之殊敬也簪纓陪位衿佩圍
橋長裾霧會仙組雲影始橫經以讐問旋拊石而吹匏

誦遺言于姬孔沐雅化于唐姚禮讓之容咸近光于黎
獻豈弟之澤庶作人于譽髦斯則

聖天子風聲之四訖文治之丕昭也曲阜名區魯原舊
聚陪敦土田復除繇賦增講肄之常員沛匪頒之異數
推恩則徧及師儒錫爵則旁流支庶五經博士不遺凡
蔣之封九命上公奚啻褒成之胙斯則

聖天子崇德之盛心興賢之宏務也於是采甸侯衛公
卿大夫期門式道執戟荷戈文學掌故之士垂髫戴白

之徒縱觀典禮蹕濟天衢涵濡化澤屬厭道腴既雀躍而抃舞亦鳬藻而歡愉萬人一口聲滿公車惟我

后之東巡修百王之令式答珍貺于三靈聽衢謠于百室卻瓊檢以勿祈屏銀繩而詎飾騶從清嚴儀文簡質更不譏呵民無供億協時正律埒虞氏之省方納價陳詩儷姬王之述職既陟山以哀對還翕河而問俗採哲陽之舊歌晞榮光之新燭朝宗滙江漢之波玉帛奉塗山之錄非漢日之寧莢乃堯年之刻玉若乃慶惠殷流

湛恩四周給租賜帛省刑釋囚虛衷清問博延廣諏如
天光之下濟如露濃之上浮始汪濊于五土旋奔淪于
九州今又茂明至道導揚正學虎炳龍章金追玉琢浴
我以詩書弘我以禮樂盛德登閣大猷輝卓愼六合而
被英蕤鼓八紘而排氛濁誠振古之隆規開天之偉略
也

天子方且回輿京室倚佩軒墀道岸先陟德契自持庀
政考業基命勅幾辨色以臨黼宸視夜而啓彤帷定仁

義中正之極稽因革損益之宜不解冰淵之念彌勤
鐸之思所以泰階順軌乾策迎禧上理隆洽茂化雍熙
治方侔于砥屬俗已進于循蜚四海壽康恬于鶉居之
代萬年鼎祚鞏于鼇極之儀

懋勤殿秋蘭賦

有序

輕風流火白露迎涼雲淨天高秋空氣爽

君王宵旰燕閒愛茲澄景御圖書之秘閣發清商之雅
音乃有叢蘭獨榮秋殿芳香自發枝葉相扶植以青瓷

園以朱檻斯亦託根之至榮者也

臣朝夕

經緯味彼芳潔敬成蕪賦以奉

宸懽其辭曰

臣

聞蘭之生也隱於空山被於幽谷其守

貞也雖無人而亦芳其德馨也不因風而自續是以尼

父發猗蘭之歌郢客和幽蘭之曲當其植根九畹毓秀

三湘昔作騷人之佩古稱王者之香名楚臺而留賞啓

漢殿而發祥

漢武帝生於猗蘭殿

養親續蘭陔之詠燕賓泛蘭渚

之觴莫不惜茲嘉卉欽彼幽光慨自人誇春豔莫采秋

英陰深林而寂處偕衆草而叢生戲陰崖之翡翠侶芳
洲之杜衡惟敷華於山澤敢結想於蓬瀛一旦躋瓊堦
登玉宇拂珠簾迎繡戶泛上苑之光風含長秋之暮雨
誠何羨乎蘭皋豈更思乎蕙圃於時秋也螢光熠熠蟬
聲嘒嘒梧葉初驚飄颻文砌碧筒漸老將殘玉井之蓮
金粟猶遲未發小山之桂爾獨披紛翠葉歲蕤紫莖花
繁露重體弱香輕娟娟自賞既婉美乎幽人之潔亭亭
獨立復比德於君子之清以茲高致怡我

皇情內殿深嚴左圖右史久祛凡卉獨留瓊蕊枝垂宮
硯色侵文几何韻馥之襲人每簾動而香起

天子丙夜陳書漏沈宵永風入戶而蟲鳴月臨軒而人
靜繞鎰開歷亂之花隔幔送參差之影更憐落卉藉以
雕盤置綺筵而留盼惜餘芳於未殘喜

君心之見珍荷遭遇之良難幸處乎朱門與紫闥永違
乎長坂與層巒臣將寄言於邁軸竊敢託詠於崇蘭遂
作歌曰有香草兮華且滋鄰玉樹兮與紫芝自楚澤兮

來軒墀枝挺生兮花離離感

君恩兮欣自持觀秋蘭之獨茂兮豈微草之無知

賜金園賦

并序

余作

賜金園記述

君恩之所由紀命名之攸始猶以雲窓礪戶隱約於長
林嘉卉芳草雜遘於幽谷者鋪敘摹畫未罄其狀嘗考
昔人云賦者古詩之流也又曰古人稱不歌而頌謂之

賦夫馬融長笛王褒洞簫古人愛一物猶比擬讚誦被
於簡牘文必極美詞必盡麗況余目營心畫朝遊夕處
風雨晦明於此綢繆欣戚悲嘯於此寄託習之也久述
之也詳愛之也深言之也長竊以平子歸田未極隱淪
之趣安仁閒居未窮林壑之觀爰因勝地勒以雅辭賦
曰伊龍眠之西隩歷巒岫之盤互亂溪流而淺涉指層
嶺而遙度經樵徑之欽崎偃松出而當路羅奇峰以四
周簇青林而萬樹中有幽人遽館居士衡門碧梧清沼

縈帶修垣橋貼波而曲折柳覆堤而偏反高槐鬱其菁
蔥榜雙扉以賜金之園其西軒也齋名學圃古屋素題
草綠堦而徑仄梅入戶而枝低架茅宇以文杏葺圭竇
以香泥所以鞠淵明之衆子偕老萊之逸妻倉囷攸居
井臼是宅女獲男臧雞栖豚柵庫藏名酒廚積嘉核陰
桂叢而宵窳期以宴而以息其南軒也長廊委蛇映日
迎曦燠館溫室風靜簾垂俯海棠之香國紛嬌姹之奇
姿弄脂妍而粉膩酣春日而遲遲迺其朱欄翠幕姚魏

所家紅茜紫一捻名葩長安跨等身之樹洛陽矜徑
尺之花亦莫不露濕烟霏散綺流霞瞻曲房之南隅壓
檀欒之脩竹簣簣萬箇琅玕千簇筠粉吹香紙窗分綠
月落而影徧空庭雪壓而聲鏘寒玉斗室生白來往天
光乃敷斐几列胡牀擁亂帙凝清香蒲團挂壁筇杖倚
牆攸寧攸芋以詠以觴盼遠松而延佇藉柔荑而徜徉
其東軒也則歷幽篁之宮入古梅之里蒼幹莫名糺枝
難擬或昂藏而披雲或支離而拂水或凌煙而乍垂或

拂地而騰起挺新條以敷華積古苔而繡紫倘鄧尉之
可方伊羅浮之足齒雖珊瑚碧樹之交柯亦難並乎斯
美中則有堂名香雪樓稱鶴背檻浮花氣之端戶掩香
光之內雪皚皚而千堆鳥鶴鶴而羣隊庶可以躡王喬
之高蹤接洪崖之芳袂時則春回幽谷香動寒岑登樓
遙矚地僻花深玉田瓊圃雪苑珠林神恍忽而震蕩芳
寒烈而來侵御文貂之紫綺撫陽春之素琴何方壺之
不可復即懼斯樂之難任沿池而北桃溪橫帶深紅淺

白俯臨湍瀨夏至而綠陰繁春深而紅雨霈紆石徑於
中央襯疎楊於水外迤北而北軒在焉前場後圃左岡
右池嶧桐垂陰下植將離或倚雲而孤特或當堦而紛
披水榭西構芳塘漣漪紅蕖碧藕花葉參差鷺起而珠
露傾蟬吟而香風吹又有芙蓉的皜柳絲歷亂疎枝密
葉被於隄岸入春和而早榮當秋清而晚燦其地則羣
峰迴合襟帶田疇嶺縣亘而虛敞溪環折而深幽松屏
冠於巖岫部屋隱於平丘煙雲生而出沒忽恍惚其不

可求其室則南窗北牖延爽招涼碧紗外捲桃笙內張
如艇斯泊枕藉滄浪如臺斯屹雲山蒼茫栽芰荷以為
衣摘蓮實以為糧當炎曦之方馭喘黃犢於翳桑愛斯
地之蕭散微風起於曲廊卻締衣而不御揮紈扇而不
揚實清景之可娛覺空山之夜良其周乎四軒者則有
紫藤碧篠芳槿紅蘭或高引而垂幄或密比而成闌循
石磴而遙躋飛閣聳於北巒臨杏圃而結撰盛春暉之
綺觀其亭則也紅倚山曲江臨水芙蓉溪亭在河之渚

朱櫻冠乎崇岡喬柯映乎清沚循花溪而南征賴以憩
乎遊趾其圃則早韭百本晚菘一畦丹茄紫薑霜薤露
葵子母餘犀水陸蹲鴟寒匏並蒂甘菊連枝莫不歲粦
於北園蔓衍乎東籬朝荷耜而可樂夜翦藪而如飴其
果則紫栗千房青梅百斛柿美烏棓梨甘大谷安石珍
榴火齊赤玉西域蒲萄磊落盤屈何必移盧橘於江南
走荔支於巴蜀其泉則潄沸如珠甘芳若醴漱靈石而
常清沈丹砂而愈旨既滌洄於堦下復潺湲於花底貯

之為滌硯之池引之為灌蔬之水雖地狹而境偏信泉
甘而土美先生之處此也謝軒冕遠塵囂歎人生之形
役憫機事之日勞惟白雲之可怡誓栖息於臨臯曠天
地而睥睨何有乎螺贏之與二豪爰因四序周乎四軒
抱書攜笈移琴挈尊遂花時之早晚量風日之涼溫擁
萬軸於坐隅手一編而朝昏懷古人之可見接羲軒而
道存爾迺葆光味腴崇簡敦素息慮屏思納新吐故惟
萬物之齊觀常澹水而自裕時則佳辰淑景日麗風和

或躅徑草或倚庭柯或攀危磴或臨素波珍禽啼而未
歇錦鱗聚而遂多濯塵纓於磐石藉文茵於淺莎翹首
天地臨風浩歌落花落葉傷如之何當其春雨一犁其
耕澤澤麥覆西隴草回南陌魚戲春水生鳩鳴杏花白
先生乃服春衣振輕策循隴畝而勸農眺春雲而自適
迨夫秋潦澄清木落羣岫相弄色於寒初楓染丹於霜
後千巖爛若披錦萬壑殷如攢繡殊形異采不可殫究
先生乃命中車挈茶鐺坐丹巖臨赤城朱霞暎乎朝旭

絳雲彌於太清較四時之景物惟秋晚之莫京其遊迹
所至也則有寒潭澈碧石馬當路飛泉媚筆皎若紈素
帶麓南村沿溪別圃脩篁隱衲子之宮茂樹表貞臣之
墓縱步屨之所如隨攀涉而成趣噫噓嘻四時之序有
代謝九達之軌無終全躬耕釣以自給甘笋蕨而長年
慕彭澤之避世希香山之樂天侶春花與秋月休吾生
之自然歌曰壑有澗兮山有岑白雲度兮籠輕陰竹隲
花田春似海板橋流水閉門深鳥隔樹而闕嚶魚唼藻

而浮沈魚鳥各無意聽我歸來吟遙遙千載後何人知我心

雙谿芙蓉賦

惟雙谿之澄澈二水會於庭除出層巒而迢遞經石堰而舒徐生芙蓉於夾岸涵秋露而分敷後巖桂而發采侶丹楓而錦鋪其為色也豔而不妖麗而非侈葉鋪翠幄柯臨清沚質抗金風神含秋水每迎涼而先榮近嚴寒而未靡聯遠浦而褰芳毓千叢而霞起或朝淡而夕

緋或初碧而乍紫或以並蒂呈華或以獨秀為美或露
滴而初開或風翻而亂綺或倚松如靜女或臨淵似君
子西蜀號為錦城石卿稱為仙史更有湘江異種厥名
三醉初則蕊含淺黃淡質凝翠暮則一抹微紅朱絲如
織越三日而茜紫朱殷不可思議或先或後種非一類
于是縱輕棹凌若耶放艇則晴霞一色迴楫則彌望萬
花舟移而叢密影動而波斜晚蜂躊躇于寒蕊遊鱗噉
喁于晴沙其在晨露初晞花光如拭夕波方起景非一

色或披衣而晨興或流連于日晷任擬似之徒工非筆
墨之所能測

文端集卷三十七

欽定四庫全書

文端集卷三十八

大學士張英撰

篤素堂文集二

頌

聖學時敏頌

有序

臣聞自古哲王既優於聖性必加以聖學益精義微言
備於往牒常經大法具有成規是以涵養德性則典學

宜先經緯世務則明理為要本仁祖義則古稱先所以興大業而躋盛治也恭惟

皇上躬上聖之姿賦天亶之哲虛懷嚮學本於性生自臨御以來修釋奠之上儀首崇學校舉經筵之鉅典靡間春秋所謂觀乎人文以化成天下也

臣英當稽講幃

之制兩漢以來已肇其端唐宋諸君詳舉其事漢宣帝詔諸儒講五經同異於石渠閣光武每旦視朝罷數引公卿郎將講論經理唐太宗聚四庫書於弘文殿置弘

文館於殿側選文學之士令更日宿直與之講論前言
往行宋太祖雖在軍旅手不釋卷嘗謂李至曰人主當
淡然無欲朕無他好但喜讀書多見古今成敗宋真宗
始置侍讀侍講之官以雙日御經筵以隻日詔儒臣講
讀宋仁宗置崇政殿說書又作邇英延義二閣以禮儒
臣明代講讀之員甚備公卿執政多由之此皆漢唐宋
明以來英君誼辟崇儒重學以興起太平焜耀前紀者
也然以方我

皇上昧爽聽政即御講幄當宵衣旰食之不遑而延見
必有常度復盛暑祁寒之不輟而精勤屢逾恒規研究
於二典之學而道接唐虞殫精於四子之書而心傳孔
孟以古史為昭鑒而觀考亭涑水之鴻編以性理為淵
源而窮太極西銘之微義不更為超前古而邁百王哉
且

溫綸屢頒欲盡咨詢之益

天顏下霽不辭覆講之勞辨義則理析毫芒敷詞則聲

振金石既橫經虛受當

弘德之深嚴更披卷澄懷御

懋勤之清晏百家羅列窮奧義於天人八法兼精間游
心於翰墨斯其遜志勤敏真可謂博而有要精而能該
者矣臣英自慚謏劣無似猥蒙

聖恩拔置講幃俾侍從於細旃廣廈之間數年於茲矣
仰

聖學之崇高覘

睿懷之冲挹言之難罄知之最親願殫愚忱敷揚實德
非敢為虛詞溢美以自蹈貢諛之嫌也謹拜手稽首敬
獻

聖學時敏頌一章頌曰惟

皇天縱睿哲文明撫綏區夏覆冒函生萬物斯覩百度
惟貞仁符地載健比乾行堯羹舜牆左規右渠銘日師
湯惜陰追禹道德之林仁義之府翺翔優飫錯綜參伍
金華列席冠珮濟蹌發謨陳典源遡陶唐探河觀洛道

契軒皇春秋二仲修舉有常日御萬幾心周九服扶桑
銜照銅龍始旭六卿畢對旋臨講幄韋編在前

宸衷肅穆孔顏妙緒鄒魯微言治平之矩入德之門六
經啓籥諸子滙源探微月窟抉奧天根尚書肇起危微
精一益贊天工箕陳皇極奭獻旅獒旦書無逸宏綱大
法

聖人惟則大易精義既法而奇義文畫象周孔屬辭裁
成萬類囊括二儀開物成務

聖人惟師窮理於經徵事於史兼陳法戒深參道揆義
鏡紫陽博綜涑水網羅百代尋源索委

聖學彌廣

聖志彌沖

溫綸屢諭覆講宜崇諸臣敬答恐勞

聖躬

帝曰俞哉斯道何窮辨析精微昭宣義蘊吐詞為經發
言成訓炳炳琅琅金聲玉振封非不遺芻蕘不擯寒暑

靡輟宵旰維勤內庭清晝綳帙如雲蒐羅圖史研究典
墳闢閩微義濂洛遺文講貫之餘游心藻翰虎卧龍翔
奔會神腕掩映鑪煙繽紛玉案堂哉皇哉天章紉繆洪
惟

聖學冠古爍今滄溟東岱莫並高深天地為軌位育為
心助流鴻化昭垂雅音自愧小臣謬隨深殿日侍

宸嚴數承清宴蠡測管窺親聞灼見仰瞻

睿勤歷久靡勸惇史之職有媿則揚巍乎難名煥乎有

章歷稽前牒誰與頡頏賡颺作頌垂示無疆

昇平頌

并序

臣竊惟自昔國家席累葉之鴻休撫守成之大業承平既久類必有非常之功以蕩滌瑕穢而鎮撫生民然後皇威遐邇社稷尊安有泰山四維磐石苞桑之固焉在詩有之曰薄言震之莫不震疊在書有之曰其克詰爾戎兵以陟禹之跡方行天下至于海表夫以成康之郊隆猶以張皇六師為大訓載于詩書信有徵矣漢以兵

力定七國文景之業彌光尤已事之著明者哉益國家
之有師旅征伐猶天地之有霜雪雷霆也非霜雪則萬
物煩囂之氣不肅非雷霆則四時堙鬱之氣不宣非師
旅征伐則亂臣賊子無所警服懲創而不敢肆故霜雪
所以開陽春也雷霆所以啓晴霽也師旅征伐所以靖
侵氛致太和也天地仁愛萬物之心與聖人仁愛萬民
之心皆不得已而託之乎此者也我

國家自

世祖皇帝戡定大亂

皇上撫馭區夏以來待藩臣之恩良渥矣處之以重鎮
視之以心膂睦之以懿親極之以高爵顯秩泰之以膏
腴腴祿乃物太甘則自蠹獸久畜則思觸富貴極而驕
悍生驕悍生而反噬起平居則怙勢席寵以荼毒
朝廷遠方之赤子乃下尺一之

詔則環視而起一方作俑諸方應之以盜弄

天子之戈於潢池舉平日

朝廷所封之疆土所屬之將士所簡閱之器械所賚予之金錢悉藉以抗

天子之命據固阻險伏莽跳梁自非大奮我武以芟刈而薙獮之何以昭臣子萬世之經而彰我國家四征不庭之罰乃自始亂以來授鉞

太宗分馳

禁旅虎臣四出鷹揚奮興以漸次削平迄于今八載海內蕩定昭明無纖芥根株之遺可謂盛矣臣竊念身依

闕廷趨承

講幄者五年

簡侍近密者又四年其遠方兵威克捷之奇戰勝攻取之略戈甲組練之華折衝陵轢之勢臣雖不得而聞且見也若我

皇上八年來宵衣旰食之心則臣知之最深念赤子罹於湯火急欲一旦出而登之衽席之上每復一城一邑必

嚴諭以無擾百姓至仁也武臣進止皆恭請

廟筭以行萬里之外視如眉睫之間凡一經

聖慮則險者平難者易成功奏績刻日而應至神也簡
任將帥以武勇智略為經以持重寬愛為緯疇咨而舉
推轂而行至慎也減膳撤懸力崇簡約以佐天下兵食
之需故軍興歲久常賦不益至儉也閭外將帥時賜
手勅申誠其有能靖寇撫民者則

灑宸翰製詩篇解御服以褒異之至厚也數年來屢避

正殿朝賀一方底定宮中必焚香親告

天

祖至敬也未明求衣昧爽聽政日昃不遑暇食夜分省覽章奏不輟以籌畫天下至勞也捷書至必敬告

兩宮親承色笑懽聲溢于殿陛之間至孝也殲渠魁而舍脅從逆命者誅之歸命者撫之赦過宥罪布大誥于天下至信也天下之人但見八年之內殄滅羣寇綏靖多方震古躒今武功若此之盛而能盡知我

皇上深宮之中神武勝算焦心勞思如此之不易易哉
今者十月克復雲南賊渠授首十一月十三日夜露布
至

皇上時御乾清宮覽奏臣等叩首稱賀

御榻前

天顏悅甚顧謂臣等曰朕今日為天下萬姓喜追思逆
亂以來官民咸被荼苦更復惻然于懷臣等謹合詞對
曰

皇上仁愛之心通于天地斯所以為萬世開太平也

聖衷之一念不忘百姓者舉類此臣又伏念古者雅頌

之作以昭德紀功周宣王平淮汭而江漢興歌唐憲宗

平蔡州而淮西有頌若以方今日之功烈不足以當百

之一當時之臣猶能撰述詩頌鋪揚國美垂布金石焜

燿史冊況我

國家數年中東戡閩粵西定隴蜀北平察罕南靖滇黔

奇功茂烈炳炳燿燿不可勝紀臣職居惇史載筆左右

其敢以固陋自覆而不勉綴膚颺之末班乎謹撰頌八
章曰平閩平粵平隴平察罕平蜀平滇各指一事言之
也曰秦階平歸功

廟謨也曰武功偃樂成功重休養也統名之曰昇平為
萬世無疆慶也詩曰吉甫作頌穆如清風則臣滋愧也

平閩

閩嶠峨峨閩海泱泱灘石劍立篁叢弩張狂童逆命爰
阻我疆勢連長鯨濁亂海邦

王師奮武載旆皇皇東由姑蔑西經豫章如霆擊枯如
髮撓鉉繫頸以組俘于明光廈門逋寇歸我帆檣一民
不殲

神武孔將

平粵

古稱百粵象郡羊城昔建南藩以奠東溟乃生猺獠怙
勢憑陵不孝不弟為亂之萌

天戈所指游魂載驚既歸而命既抒而誠狼子反覆黃

鉞斯行梟巢盡覆瘴海彌清毒潭鱷埽合浦珠明五嶺
煙巒南拱

神京

平察哈

北嶽為鎮東海為垠部落環衛繡錯魚鱗中有察哈舊
我有民居我肘腋為我藩臣蠢茲負德忽煽烽塵元老
秉鉞我馬駢駢師惟一戰

命不重申殲彼強寇不返隻輪魁渠函首獻于

紫宸

太宗戡伐前烈維新

平隴

隴西涇陽俗剽民勁亂臣反戈河北咸震我師既出逐
北乘勝頓于堅城歲靡有定

帝曰元老往敷朕訓示之以威懷之以信矢不遺鋌兵
不折刃崇墉夜開頻首歸命投戈而譁悔罪思順秦隴
千禧惟以歌詠

平蜀

古惟西蜀國號魚鳧劍閣嶙峋雲棧崎嶇一夫扼險萬夫嘆吁况峙糗糧千里沃腴賊實藉之稽我

天誅將軍憑陵蠶叢坦途既克保寧遂入成都孤雛咸殪腐鼠莫逋夔門巫峽重釐版圖

皇威赫赫時聽巴歛

平滇

誕惟滇寇倡亂之先攘臂昆池竊踞湘川

王師萃止如雲蔽天威武捷伐聲震八埏巨兇既殄餘
燼猶然寄命孤城析骸經年元戎奮武伐鼓淵淵鐵橋
失險滇城摧堅剪彼鯨鯢膏我戈鋌亂源禍始藁街特
懸

泰階平

六軍振旅九服來同桃林歸馬扶桑挂弓星輝雲縵嶽
朗川融休哉鴻烈誰其始終輔弼之英貔虎之雄祇受
成命謨由

聖衷智勇天錫濬哲亶聰握機鏡要神運樞中仁慈恭
儉昭格

蒼穹鞏萬世業定此膚功

武功偃

我有弓矢願言橐之我有戈矛載衅藏之膏澤萬物雲
行雨施譬彼稂莠翦伐無遺今此良苗滋溉攸宜仰承
帝祐俯恤民疲崇文惇教返于恬熙仁風愷政浹髓淪
肌

天子萬年如天無為垂衣端拱誕受崇禧

至德弘仁頌

并序

稽古稱幅幘之廣曰東漸於海西被於流沙朔南暨聲
教訖於四海可謂盛矣然東南以海為域西曰流沙則
猶在今甘肅之境朔方亦未嘗明言所至之地歷三代
以至漢唐宋元明王化之所及車書之所通皆未有如
我

國家今日之無遠弗屆者也

皇上視荒遠之人無異於宇下之赤子凡跂行喙息者
皆欲令其安全生養而納之於軌物之中盡兩間之所
覆載不忍一方一人不獲其所書所謂光天之下至於
海隅蒼生共惟帝臣豈非聖人之心前後古今一轍哉
曩者喀爾喀雖數通職貢未盡臣服今者嚮慕

德威傾心內附欲列藩臣

皇上厚加存恤給地安置賚以牲畜芻粟恩至渥矣爰
以康熙三十年孟夏之吉

車駕親自拊循羽林之士雲附景從至于邊徼之地七
旗喀爾喀君長等帥其衆十有餘萬人傾誠効命於
龍旂鸞旆之前莫不扶老挈幼稽顙流涕感恩呼籲
皇上育以至仁撫以至德錫宴頒賞咸從優渥發

德音下明詔量其嚮化之誠予以世守之爵其族衆皆
賜秩有差復為之申法禁布規條俾與北藩四十九族
同沾恩澤永遂生養猗歟盛哉我

皇上之德丕冒比天地照臨并日月會合如風雲濡澤

若雨露昭明法律如三光之麗天底定方隅如四維之
奠地恩賚禮成羣心欣悅普天率土莫不歌頌前史紀
載罕覩斯盛臣忝居惇史之班敢對揚盛美祇獻頌曰
維彼遠人雖處漠北自天覆之豈有方域幹止罔克

聖心憫惻好生之仁維帝時則一章

靡憚暑雨跋履山川安人是亟懷遠宜先滌其危苦賚
以生全稽顙至止歡動八埏二章

何以宴之旨酒維盈何以錫之庭實百朋龐眉皓首扶

杖來聽天膏所沛萬類咸榮

三章

自古仁人繼絕舉廢存其名號勿殄厥世永為北藩版

圖是隸帶礪之封爰及苗裔

四章

聖慈蕩蕩令甲煌煌維仁是育維義是綱教以親遜爾

無胥戕食我茅土率我典章

五章

我德既敷我武孔揚如雲如電戈甲騰驤如虎如貔騎

官蹶張天威赫耀震肅遐荒

六章

自茲遠人保聚生息如溺斯拯如槁斯植耕田鑿井惟

帝之力錫爵分珪惟

帝之德

七章

駕轉六龍雲生九陌甘雨載塗澤我疆場人和致祥敷

天悅懌盛舉永光昭于簡冊

八章

聖德仁明武頌

并序

蓋聞宏胞與之量者不以中外殊觀建久遠之模者不以煩勞易慮是故事以除暴為大憑陵邊境則必誅虐害醜類則必誅背恩棄誓則必誅必不使遐方赤子猶

有擾其覆載之天者仁之至義之盡也功以克斷乃成
焦心勞思而不辭櫛風沐雨而不辭涉遠踰險而不辭
必不使兇頑梗化尚得留其牙孽之害者謀之遠慮之
周也駿烈冠乎百王英武邁於前古如我

皇上今日之滅噶爾丹者是已臣謬以謏劣微材獲侍
從于細旃廣廈之間者最久竊窺

宸衷所注惟以愛養生民牧寧遠邇為至計凡在覆育
之下者皆欲以安全遂其生業有厄魯特噶爾丹者在

當日原為請

安納貢之國乃孽由自作狡詐狂迷與喀爾喀為仇喀爾喀既歸附于我為

國藩臣而噶爾丹陵虐侵殺之不已以至闌入烏瀾布通之地為我師大敗幾殲其族彼當困迫則設誓更不敢犯

皇仁宥之於前矣自以僻處塞外怙惡不悛憑恃其衆蠶食鄰壤肆行悖逆潛入巴顏烏瀾之地奸謀叵測思以煽惑蒙古諸部落害將滋蔓夫稂莠不翦則無以安嘉

禾蛇豕不除則無以靖疆宇大哉

王言噶爾丹若不即行勦滅邊鄙何由得寧此我

皇上爰整六師不得已而遠征之至意也分大兵為三路以成犄角之勢籌糧餉練火器礪兵仗精鎧甲鼓勵將士秣馬賞兵出帑金以百萬計自鉅至細無一事不在天心籌畫之內宵衣旰食謀慮周詳此我

皇上經營于法宮之中決策于樽俎之上者然也

親統中路大兵以三月出塞戈戟耀日旌旗蔽空軍威

之盛谷撼山搖向來水泉乏絕之地經

指示而泉涌向來平蕪未青之時迎

鑾輿而草茂百靈協應萬騎飽騰我

皇上減膳省餐以與六師同甘苦飭行陣明紀律謹刀
斗嚴斥堠日日淬礪而申警之拊循而賞賚之熊羆之
士無不奮勇百倍此我

皇上勤勞于帳殿之中振肅于塗次之際者然也噶爾
丹夙稱詭譎亦恃險遠度瀚海沙磧素無水草難以飛

越忽聞

至尊親臨天威所懾震駭惶懼棄其髻倪輜重鼠竄狼奔冀延殘喘我

皇上萬全勝算料彼必潰遁而西預遣將軍領兵堵截聖躬率兵師奮勇追逐窮寇狼狽已極而勁軍適當其前一鼓而勦滅之殲其衆俘其子女收獲其牛馬牲畜數十萬逆命者誅之來奔者受之一日之間而國燼矣噶爾丹之支吾跳梁總在

睿算指顧預定之中纖毫不能越吾之範圍如摧枯拉朽探囊而取耳此我

皇上靖寇于七旬之內成功于大漠之西者然也頑梗去則邊方靖邊方靖則遠人安從此數天絕疥癬之疾率土享寧謐之福

皇上又安中外之心慰矣時雍熙皞之化成矣蓋由我皇上以彼蒼仁愛之心為心以乾元剛健之德為德不憚一身之煩勞而惟求萬方之康又不懷一時之安逸而

必謹百世之防維猗歟休哉臣于斯舉也管窺蠡測見我
皇上丕冒之至仁審機之至明經世之神武超越從古

英君哲后

聖德神功巍然炳然為史冊所未有也豈臣寡聞渺見
所能摹寫其萬一者哉謹作頌九章以附于賡飏之末

一章

維

帝至仁覆幬惟均恩周九服化洽九賓誰其擾之痼瘵

在身曾經宥釋誓言載申

二章

維

帝至仁化被無垠狡寇鴟張如蜚抗輪自膏斧鉞以警
不臣彼投戈者咸與維新

三章

維

帝至仁德配高旻蕩蕩王路彼自罔遵立殲封豕盡滌

邊塵凡有血氣莫不尊親

四章

維

帝至明建威消萌雷霆之擊必待

親征中權黃幄西北連營神謀勝畧巨憝以平

五章

維

帝至明紀律師貞壁壘宜肅鎧仗維精宣勞慰諭以勵

羣英

天戈所指計日功成

六章

維

帝至明洞察彼情

六龍天降獸駭鳥驚自焚其巢宵遁西行一鼓而燼值我勁兵

七章

維

帝神武采入其阻遐荒愚寇驚膽孫羽如獸觸樊如魚
困釜奔突不遑孰敢予侮

八章

維

帝神武赫然斯怒瀚海飛沙罔憚勞苦自秉寶刀

躬持玉斧率師迅逐計日而五

九章

維

帝神武萬方作觀計安黎元冒寒觸暑七旬減賦歸歌
杖杜偉烈英風超邁千古

聖武三臨絕塞蕩寇功成頌

有序

皇帝承天景命臨御宇內勞

九重之宵旰謀萬姓之乂安所以撫綏而教養之者至
矣備矣蠲租之詔歲必數下史不絕書嘉惠元元動以
數百萬計積貯之令行於豐稔徧於州邑所在有數十
年之儲凡此無非為百姓計也曩時三逆盤結為天下

之蠹將來必致荼毒生民於是

大奮威武翦除而廓清之蓋

聖人之心欲使薄海內外戴髮含齒之氓咸遂安養共
樂生成同登仁壽之風永底時雍之化

深宮睿慮之所孜孜圖維自朝至於日中昃不遑暇食
者惟在乎此也然又安中土之心甚切則不得不安邊
徼欲安邊徼則不得不除寇賊此理勢之必然者斯時
荒遠之區脫有梗我

王化伏莽跳梁之人則將來必益為邊患則必調發轉輸以遠煩禁旅勞頓九州之民此

聖心所以惓惓焉為國家計久遠為生民謀休息為萬世立太平必欲蕩滌此狡寇厄魯特噶爾丹者蓋所以安邊塞也威遠人也實所以又安中土也維丙子季春聖躬親御六飛遠度瀚海戈甲耀日旌旗蔽空風馳雲集俯瞰賊壘如自天而下為狡寇之所不及料披靡奔潰獸駭鳥散勁旅堵截一鼓而草薶禽獮之賊雖遁跡

荒遠而部曲盡矣牧畜空矣奄奄之息何能久存據庸衆之識似更不煩

車駕之再臨王師之久駐乃

宸算制敵迴出尋常留將軍於塞上以困蹙震悚之

聖躬以丙子冬復臨邊塞渡河至鄂爾多斯之地經畫

布置丁丑春又

親至寧夏駐蹕於狼居胥山遣師搜勦蓋

聖心以車駕逼臨其地則我之將士百倍奮勇而彼之

部曲惶駭離畔振如雷如霆之威兇渠自褫其魄沛如雨如露之澤黨與咸貳其心所以俘其子而來獻者彼之鄰國也遣使而輸誠納款者彼之腹心也賊雖狡悍斯時四顧無親入地無路以膏斧之軀為飲鳩之計惟有自即殄戮耳安能出

聖謨成算之外哉總由我

皇上躬親指示奇正兼施恩威並用視絕域於掌上羅曠獸於阱中故成功若斯之盛也蓋非至明無以審機

而不惑非至誠無以歷久而不倦非至斷無以成功而不疑而總歸於

聖心之至仁視邊方為一體而不忍數罹其災也登寰宇於衽席而不忍以一事煩苦吾民也是以

三次遠臨絕域跋涉山川冒觸寒暑

親舉玉趾恒飲濁泉風雪則屏去帳殿減餐則俯同士卒揮黃鉞以先驅擐甲冑而達旦指麾形勢則極在巘在原之勞籌畫機宜則窮九地九天之秘焦勞煩苦不

可殫述

聖躬皆親歷之仁天下子萬民之心至矣蔑以加矣今者逋寇悉平荒遠無不臣之國邊烽盡息諸蕃皆樂利之年大功告成盛典斯舉以副我

皇上又安中外之心成我

國家太和熙皞之化永永萬年至於無極臣竊惟

聖武三臨絕塞殄寇寧民焜耀史冊上下千古無與比隆謹撰頌九章以述盛烈頌曰

維丙子春

聖武丕揚組練十萬氣吞朔荒

帝親率之沙磧騰驤殲此獯貊膏我斧戕

右一章

維胸臚河遠帶荒服自

天臨之泉甘草綠立覆其巢揮戈西逐萬古不磨

聖人之躅

右二章

寇方奔突西遇我軍風掃霆擊狐兔披紛飽我卒伍殄厥醜羣

神謀指授者定大勲

右三章

維丙子冬雨雪載塗黃河曲岸

鑾輅馳驅除惡務本宜絕根株時哉勿失洋洋

聖謨

右四章

河流浩浩虎旅雲屯震之以武綏之以恩風馳青塚化
洽烏孫呼韓接踵稽顙

至尊

右五章

天與不取昔人所嗤張我精銳燼彼饑疲乘機維扼
要乃奇

聖人之智匪衆所窺

右六章

維丁丑春經武西偏狼居胥山古史所傳
天子韎韐威暢八埏遠鄙西漢勒銘燕然

右七章

都邑聚觀孽子成俘鳩張鉅寇一夕殄誅彼脅從者咸
輸爾孚

魏功駿烈振古所無

右八章

玉關萬里靡塵不清覆載之內咸震

天聲外安中又億載功成金函玉檢永頌昇平

右九章

聖德勤民頌

有序

維丙子丁丑歲以春以冬

聖躬三駕絕漠以憂勞萬民之故為久安長治計踰越
沙磧蒙犯霜霧濁泉菲食日以供御擐甲胄以終夕摩
干楯而達旦北遡黃河西踐狼居胥翦除狡寇以安邊
圉以靖區夏使永杜餽餉裹甲之萌

聖心之勤民深矣至矣不遑啟處三載于茲邇年以來
中外無疥癬之疾服教畏神者遠自日出扶桑極於流
沙莫不梯山航海奉琛載贄八宇昇平四民樂利皆

聖天子之所經營締造櫛風沐雨垂四十年而致斯盛
也承平奏矣

聖衷念此時四海之內為民患而未至底定者則莫大
于河以言民生則淮揚千里未有奠居以言國計則漕
輓天庾為南北咽喉之地以言修築則歲費水衡錢以

鉅萬計以言泛溢則城郭耕桑時時可慮是今日勤民之事洵無有急于此者矣在河道諸臣或識固一隅而不能周知全勢或苟且一時而不能經畫久遠或拘守己見而不能廣集羣謀或徒糜金錢而不能收集成効我

皇上焦心勞思講求兩河者數十年考究形勢酌量高下揣度旱溢每廷議時恭聆

天語則羣心豁然蓋諸臣見其偏而

聖心見其全諸臣謀其暫而

聖心圖其久故燭火曦照若斯之懸絕也已卯歲春

車駕臨河上

躬親指示淮黃之勢始洞若觀火諸臣奉

睿謨以集事而安瀾可永慶矣

聖心念治安天下之大計兵革既息則莫要于察吏寧
民布德施惠以通輿情而聯衆志

巡幸東南頒布德音以次第舉行之留漕粟以平糶蠲

逋賦以阜民減稅課以裕商廣取額以作士滌除刑獄
宥釋過愆獎勵官方存問耆老凡所以勤勞百姓者莫
不周詳委曲殊恩渥澤洋溢汪濊可謂至矣

鑾輿所莅供給之費一絲一粟不以煩百姓嚴飭從官
無有侵擾

萬乘所歷市不易肆農不輟耕近光

天顏懽聲雷動焚香而祝

萬壽者所至填塞馬首如廣野雲屯滄海潮集

皇上皆溫顏慰諭之瞻雲就日真曠古之所希覩蓋我
皇上以天下為家故巡省風俗皆綢繆戶牖之計也
皇上以萬民為子故嬰孺遼膝皆撫摩顧復之恩也且
祇奉

慈宮朝夕承懽孝德超于千古率

諸皇子左右提命景福邁于百王臣幸際昌時恭聞盛

美懽呼忭舞罔知所極不揣謏陋敢撰蕪詞謹獻頌十

章章八句

一章

賡颺

聖孝振古所稀金根玉輅日侍

慈闈萬姓稽首綵雲六飛以天下養六宇春暉

二章

河源星海淮號鴻流稽天浴日為萬姓憂

親舉玉趾相度咨謀安瀾胥慶禹功式侔

三章

東南岳牧輯瑞來同哀對

天顏肅肅雍雍仁風翔洽愷澤醇濃四方民隱達于

聖聰

四章

爰溥國儲軫此艱食蠲逋已徵數盈萬億阜民之生恤
商之力堯衢蕩蕩載歌

帝德

五章

百郡羣吏整飭聯常簡茲良牧寵以服章
訓辭溫謫錫賚輝煌時邁之典事在激揚

六章

龍旂所指嘉氣冲融釋辜宥過恩逮臣工
桁楊盡偃犴狴咸空無微不照上厪

宸衷

七章

山海保障熊羆是資訓練嫺習武不可弛
爰遵江許營

列水犀申明令甲以肅鼓鼙

八章

菁菁者莪育彼中陵采芹采藻集于泮林念茲微末
聖澤溥承誦讀之士霞蔚雲蒸

九章

天章寶翰溥及臣鄰人懷拱壁家蘊奇琛龍翔紫渤鳳
翥高旻名山福地光氣常新

十章

愛戴羣情如依父母如潮如海如林如藪扶杖而迎亦有黃耆酌彼兕觥

天子萬壽

聖德仁民天錫萬壽頌

并序

臣嘗竊考董仲舒有言曰人君每事未嘗不求端於天
天以愛養生民為心凡所以子惠而煦育之者一付於
建極之一人恭惟我

皇上天亶至聖慈愛為心仁育義正為德臣自備員史

官以來侍

講筵直

內廷者三十有餘年於

皇上早作夜思之際宵衣旰食之頃無一時不以愛養
生民為心無一事不以講求利濟為主其養民也則田
疇樹藝不厭其詳水旱災祲務求其備其教民也則敦
本明倫必先其重人心風俗務底於淳蠲賦之多史冊
罕聞每歲數百萬周流公溥海內無不被之德省刑則

矜恤惻怛法古刑期無刑之義寇攘蠱賊所以害吾民則變伐掃除之必盡雖

命駕三驅櫛風沐雨而不以為勞水潦隄防所以衛吾民則殫心竭慮方勵精于南而又營念于北務俾底定以利耕桑察吏則博求循良有一善之可以裨吾民必顯揚之不遺以至省方求瘼疾苦必聞懷綏遐方無遠弗屆蓋

聖心無一念之不注意于斯民而天下之民涵濡沐浴

于

聖人之心亦無不鼓舞振作樂利感戴

聖人之化熙熙皞皞如萬物之鼓動于太和而不覺以此而言德則曰盛德曰天德以此而言仁則曰至仁曰純仁夫德既合天則天心眷佑萬壽無疆之慶臣再賡天保九如之章矣此臣悉之于數十年之久

起居必覩謦欬必聞知之既真且熟而天下之感頌

聖人者在朝聞之在野亦聞之故不禁其言之詳也獨

臣年齒既老且謏陋無文不足以抒揚萬一敢竭其愚
陋而質言之謹獻頌曰食為民天古昔所陳祈穀

上帝必謹元辰茫茫禹甸耕獲畇畇一夫不耕上厓

紫宸猗歟盛哉此

聖心養民之仁

其一

聖有謨訓誥諭諄諄務去爾詐務返爾淳民之質矣日
用明倫肅肅章縫咸捧

溫綸猗歟盛哉此

聖心教民之仁

其二

賦有常經宇內式遵孰是盡蠲振古莫倫動以百萬大地皆春鴻慈浩蕩藏富于民猗歟盛哉此

聖心蠲賦之仁

其三

大化翔洽間有未純欲並生哉入我陶甄赦過宥愆咸與維新好生之德洽於蒸民猗歟盛哉此

聖心欽恤之仁

其四

蠢爾弗率擾我邊塵侵軼疆圉荼毒生民

親舉玉趾三駕重申殲厥渠魁化彼未馴猗歟盛哉此
聖心除暴之仁

其五

桑乾泛溢淮黃久堙謀民奠居莅止河濱經營胼胝不
啻

躬親南耕北穫成功如神猗歟盛哉此

聖心底定之仁

其六

州邑遠吏撫民最親一善必錄簡畀

彤宸或臧或否民依是甄民所與者錫以

寵綸猗歟盛哉此

聖心察吏之仁

其七

詩陳時邁禮重躬巡閭閻疾苦

攬轡咨詢蒸蒸黎庶濟濟臣鄰光天之下甘雨陽春猗歟盛哉此

聖心省方之仁

其八

凡在宇內覆載維均窮荒絕徼洞瘵在身日月所照聲教咸遵

深恩渥澤蟠際無垠猗歟盛哉此

聖心懷遠之仁

其九

維天蓋高穆穆化淳

一人體之徧育羣倫德積于世慶備于身于萬斯年何
福不臻猗歟盛哉此

聖心合天之仁

其十

文端集卷三十八